

أنا شهر زاد

معقول أكون لك شهر زاد؟!
تستني قربي ف المعاد
وتعيش معايا كتير حاجات
معقول أداوي جراح هواك
وتنسي ويايا اللي فات

أكيد بحلم وحلمي جميل
لكن حبي أكيد واقع
وعندي دليل

بانك كل أحلامي
وإنك عشقي وغمامي
وان وجودي ف وجودك
وبعدك عني إعدامي

معاك اليوم يفوت ثانية
وأعيش ف الساعة 100 دنيا

ودي الحسبة اللي شغلاني
صحيح اليوم فيه كام ساعة
وبرضو يعدوا ف ثواني
ولما القرب ينساني
أعود تاني لأحزاني

تاخذني عينيك ف أحلامي
وتجمعنا حكاوي الليل
اسرح جوا أفكارك
وأراجع كل أشعارك
وامشي معاك ف مشوارك
ورغم البعد تلمسني
وعايشة معاك ف أحلامك
والأقي الفرحة قدامي
بتفتح باب
ف ليه أسأل واتحير
وعندي جواب
مليش غيرك أعيش لهواه
ولا غيري لقلبك زاد

أنا شهر زاد
أنا اللي معاك بتتلاقي مع مرايتك
أنا ذاتك أنا منك
أنا القلب اللي حب بجد
وأنا اللي شبعت من عشقك

وبوحك كله كان ليا
عن الماضي وعن بكرة
ولو مرت عليك فكرة
وعن أوهام محاها الشوق
وصبحت ذكري بعديا

أنا شهر زاد
أنا اللي فتحت للجنة
ف قلبك باب
أنا اللي وجودي كان ملموس
وغيري سراب
أنا اتسجلت بحضوري
وكان دوري
أشيل عنك ليالي عذاب

واخلي الحب من قبلي
بلي ذكري
ف كشف غياب